

長壽縣志卷十三

物產 動物 植物 礦物

厚生利用莫重乎土產舉凡三農所生園圃所毓以及翼飛脛走穴蟄淵潛山藏石韞芸芸焉總總焉幾莫可名狀斯皆菁華之氣各以土地所宜供吾人之採取者然非順天時度地利盡人力而食用終不能恆足長民者於董率勸課之方又烏可緩哉 志物產

植物

穀之屬

稻 稻有二種有粘者有不粘者不粘者為粳粳者硬也與軟糯之糯相對而得各種類甚多有貴陽粘紅邊粘烏脚粘白油粘浮面跑百日早三百粒羅漢穀馬尾粘十月黃大葉 一名葉下歲 八十早施南早陽塵早大白穀小白穀洋白穀等名粘者為糯性質軟糯食之令人貪眠故名種

長壽縣志

卷十三

類亦多有早糯大糯油糯紅殼糯矮子糯白瓷糯堆子糯紅邊糯芝蔴糯馬尾等名老農云肥田不如換種最注意者莫如選種當全種黃熟呈黃金色之時候天氣晴明兩三日無雨採先出之穗以桶貯水一斗梗米入鹽百二十兩糯米入鹽百兩待溶解後徐入種五升攪之再三凡浮水上者多不佳宜除去而用其下沉者納袋中緩縛之浸漬清流或池水中約七日至十四日如無清流及池水則桶貯清水投以選種時攪之每日換新水然後布席曝兩三日藏之無溼氣處於播種前常使溼潤則發芽迅速且無遲早之差

梁 曲禮梁曰香其俗呼高粱

說文梁性涼

故謂之梁春月布種秋月收莖高

丈許狀似蘆荻穗大如帚粒大如椒赤黑色有二種粘者可和糯作餌釀酒不粘者作糕煮粥可以濟饑稍可作帚莖可編籬供爨紅黑黃白雜色兼備性甘氣平能益肺胃有利於人者甚溥

玉蜀黍 俗名包穀莖高六七尺葉生於節花著於顛莖腋生包包內結子纍纍然如貫珠有八列十二列十六列之別色有黃紅白種類甚多大小早遲不一大概分粘糯二種釀酒磨食均佳吾邑山多田少種土人家率以代半歲之糧

麥 大麥爲牟小麥爲來詩曰貽我來牟來牟或作麩姓大麥兩種皆有芒殼可芽可羹脫其殼爲飯與稻等小麥只一種南北所產不同南麥花夜開北麥花晝開北麥性溫食之益氣添力南麥性熱食之助溼生痰以秋種以夏熟惟麥得四時之氣兩種之稈均可製草帽選種之法與選稻同惟小麥較大麥質量稍重故用鹽水宜稍濃耳

黍 禮記黍曰薊合俗名小米說文黍禾屬而粘者也亦曰黃黍黍苗似蘆高丈餘穗黑色實圓重古人定律累黍以生律度量衡後人取黍定之終不能準蓋必用上黨秬黍色黑一桴二米乃黍之中者均勻無

長壽縣志

卷十三

二

大小然上黨亦不常有也又古以箬葉裹成糗謂角黍五月五日人家多製之

稷 俗亦名小米曲禮云稷曰明粢一名稭似黍而小說文稭糜也似黍不粘李時珍本草綱目謂粘者爲黍不粘者爲稷爾雅翼黍大體似稷又詩云彼黍離離彼稷之苗通志謂稷苗似蘆而米可食是黍稷相似皆如蘆李氏謂爲一類二種是也

蕎麥 本草一名蕎麥有甜苦二種甜蕎又名花蕎赤莖綠葉莖高三尺葉形三角花小而白結實有三稜其味甜苦蕎莖青多枝葉花帶綠色結實亦似甜蕎稍尖而稜角不峭其味苦二蕎均年種兩季春種夏收秋種冬收育成之期甚速栽培亦不甚費勞力用以磨麵滑細如粉可作餅餌以濟食用每遇旱年農家多種之乾田以救荒但種苦蕎者不及甜蕎之多

黃豆 廣雅云菽莢角類之總稱黃豆有大小二種莖高一二尺葉圓有尖開小白花成簇亦間有赤綠二色結莢長寸餘可作腐造醬生芽入饌又可榨油牛莊一帶出油以此爲大利源宜種於粘質之土壤或麥隴間化學家考析此豆最富滋養料含蛋百質故所製醬一切百工勞人肢體疲倦者欲補其消耗之質非此不可凡豆莖葉皆可飼家畜充肥料其十月熟者名十月豆

黑豆 黑豆亦有大小二種小者爲雄豆可入藥本草綱目陳藏器曰黑大豆炒食極熱煮食甚寒作豉極冷造醬及生芽則平馬食之冷牛食之溫製造不同性亦數變又有棕色者名棕豆

綠豆 本草李時珍曰綠豆以色名舊本作藁者非有數種粒粗而色鮮者爲官綠皮薄粉多粒小而色深者爲油綠皮厚粉少早種者呼爲摘綠可頻摘也遲種者呼爲拔綠一拔而已可作粥磨粉澄濾取粉可

長壽縣志

卷十三

三

作饊餌水浸生芽又可入饌濟世良穀也

缸豆 一名裙帶豆有白紅紫赤斑駁數色莖蔓引一二丈葉爲羽狀複葉結實成莢長至二尺嫩時采莢醃藏最佳老則收子貯以爲食品飯豆 古名白豆本草釋名飯豆俗又呼大米豆莢實俱似缸豆惟色純白莢較短硬而微曲蔓延不如缸豆之長熟在秋初粥飯均可拌食又可作腐

四季豆 年可種兩季故名二季豆俗呼爲四季豆葉似綠豆花白色自根自稍皆繁衍莢長二三寸而微曲子鮮紅色亦有白者每莢中或三五粒外有一種泥鰍豆俗呼洋四季豆莖葉花莢無異惟莢稍直而色微白耳

刀豆 本草釋名挾劍豆李時珍曰以莢形名也莖蔓生引一二丈花紫色莢長五六寸扁面劍脊三稜宛然嫩時煮食醬食蜜煎俱美老收

其子熟食尤佳

爬山豆 宜種山坡故名莖蔓生葉柔滑蔓長三四寸實赤莢可麵可粥可煮食吾邑山地多種之

蠶豆 本草釋名胡豆李時珍謂豆莢如老蠶故名王楙農書謂當蠶時始熟故名漢時張騫使西域得胡豆種歸卽指此也有大小二種先百穀而熟隨地皆宜可備歉荒莖葉莢均可作肥料邑多種之

豌豆 一名胡豆又名回紇豆以其種來自回紇國也今則蜀人專呼蠶豆爲胡豆而豌豆名胡豆人反不知有紫花白花二種先諸豆熟炒煮均佳磨粉尤良又有一種豆稍狹而微曲者名稜角豌豆時摘莢和肉煮食味美邑多種之

麻 俗名火麻子有雌雄雄者爲臬雌者爲苴農家擇其子之有班黑紋者謂之雌麻種之則結子繁爲米穀上品又可取油皮可績布扭繩

長壽縣志

卷十三

四

其楷白而有稜輕虛可爲燭心日本高橋重郎著有麻栽製法

胡麻 俗名脂麻非芝麻以其種由漢張騫得自大宛故名胡麻實含脂甚富故又名脂麻有黑白二種陶宏景謂八穀之中惟此良以其不獨爲食用又可製油也李時珍謂取油以白者爲勝服食以黑者爲美

蘇麻 有白紫二種子可榨油亦可服食沙州記云乞胡虜之地不種五穀惟食蘇子吾邑用子炒熟拌餈糖與脂麻同用

蔬之屬

菘 俗名白菜陸佃埤雅云菘性凌冬不凋有松之操故名菘一種莖圓厚微青一種莖扁薄而白葉吾邑有包頭百蓮花白等名又別種名黃芽菜均稱佳品生熟皆可食乾製醃藏俱宜

蕪菁 俗名青菜有蔓青諸葛青菜等名劉禹錫嘉話錄云諸葛所止令兵士獨種蔓青至今呼爲諸葛菜吳中又名雪裏青經冬愈佳莖圓

而葉如雞冠者宜煮食其生苞者名繡球菜吾邑商人近用此種製榨菜多至數千緡每緡若干斤運往滬漢出售頗獲厚利

萊菔 俗名蘿葡六月下種秋採苗冬掘根春末抽苔開小花紫碧色夏初結角如火麻子五月亦可再種俗名熱蘿葡有圓長二種紅白二色生沙壤者脆而甘生瘠地者堅而辣根葉皆可生可熟可俎可蔬可醬可食可醋可糖可臘可飯乃蔬中最有益者先選佳種鋤土務深其地若有瓦礫及草木根便生多歧既播種覆以土且鎮壓之發生後經五六日則去其劣者存壯者三四本施肥料閱二三星期再去劣者存優者一二本則根自肥大矣

葫蘿葡 李時珍曰元時自葫地來氣味微似蘿葡故名有紅黃二種俗皆名紅蘿葡六七月下種生苗如嵩莖有白毛辛臭不可食冬月掘根長六七寸大者盈握味甘脆吾邑惟南岸多種之

長壽縣志

卷十三

植物

五

雲薑 俗名油菜一名雲苔本草綱目亦名油菜李時珍謂此菜易起苔須去其苔則分枝必多故芸苔子富油汁故名油菜准人謂之芸芥種來羌隴氏胡謂之胡菜春時可採台作蔬夏月收子榨油分高矮二種矮者油較濃婦女澤髮必選此種油屏可飼魚肥田莖葉均可作肥料

薑 說文作疆禦溼之菜也王安石字說能疆禦百邪謂之薑苗如初生嫩蘆而葉稍闊葉係對生亦辛香秋社前後新芽頓長如列指狀謂之子姜采食頗佳秋末冬初則愈老愈辛矣生熟醋醬糟鹽蜜醃俱宜吾邑向由外運至現時間有種者

菠菜 本草名菠菱一名波斯草唐會要云太宗時尼波羅國獻菠菜菜莖柔中空根赤長數寸故名赤根草八九月種者可備冬食正二月種者可備春蔬但久食令人脚弱以其性甚滑也

菘菜 一名蓬菜幹長如蔓中空葉如菠菱菜李時珍曰性宜溫地畏霜雪九月藏入土窖中俟來年三四月取出壅以糞土卽節節生芽一本可分蒔一畦

甜菜 一名君達菜俗名牛皮菜葉甚厚故又名厚皮菜四月開小花或黃或白結實如茱萸狀其莖燒汁洗衣極白

莧菜 陸佃碑雅云莧之莖葉皆高大易見故字從見凡六種吾邑惟赤白兩種有柳葉蝴蝶之名至馬齒莧無人種植野生者不佳

窩苣 俗名窩苣李時珍謂自暹國來故名葉青白莖折之有白汁粘手剝皮生食味如胡瓜糟食亦良鹽曬壓實尤可經久宜種肥地

筒蒿菜 綠色形如列缺微似白蒿本草一名蓬蒿均取其形色同蒿也二月下種可常食八月下種冬春採食四月起臺高二三尺花色深黃子繁衍成球形最宜肥地

高筍 宜種水田中葉長如莖蒲高數尺根如竹筍有殼數層心如窩苣色白而碎燒食最佳宿根次年自生二月分蒔之八月可取食

芹菜 本草名苦蕒一名水英又名楚葵陶宏景曰蕒字俗作芹嫩葉可作肉食香料芹有水芹旱芹兩種水芹生陂池旱芹生平陸吾邑間有種者

冬莧菜 本草名冬風菜又名東風菜言冬者得冬氣也言東者先春而生也莖高尺許葉圓而厚煮食最美俗名叫馬蹄菜吾縣家家種之九英菘 俗名大頭菜李時珍謂九英根大而味短有二種莖整者名枇杷菜莖缺者名蝴蝶菜用以醃製可經久致遠

茄 茄音伽陳藏器本草茄一名落蘇莖高二三尺葉大如掌自夏至秋開紫花五瓣相連黃蕊綠蒂其實有團如括篲者有長四五寸者分青紫白三種澆糞勤且多則味鮮嫩下種時初見根處擊開納硫磺少

許以泥培之則實多而大味且甘諸茄至老皆黃子可入藥

焯椒 李時珍謂焯性辛辣如火焯人故名一名番椒大者名柿子椒極小者名一嚼椒莖高尺許夏乃花白色五出倒垂如茄花結實青色熟則朱紅奪目吾邑種作常食或醃或搗每飯不離

川椒 一名花椒莖高丈許有刺葉爲羽狀複葉對生春日開小花黃綠色雌雄異株實圓小熟則色赤裂開黑子外現實及莖之皮部皆爲香料氣甚烈以多生於秦嶺故名秦椒種宜肥潤地以灰糞和細土覆之則易生

冬瓜 本草綱目冬瓜經霜後皮白如粉塗其子亦白故又名白瓜正二月種之若十月種者結瓜更較春種肥好李時珍曰冬瓜生苗引蔓葉圓而未尖莖葉皆有刺毛結瓜大者徑尺餘長二三尺其瓢謂之瓜練白虛如絮可以浣衣其肉可燒可煮可蜜其子可入果品瓜土必去

長壽縣志

卷十三

植物

七

舊壅新益以肥料擇透風之處灌溉得法一瓜可重三四十斤

南瓜 俗名荒瓜李時珍曰南瓜種出南番故名二月下種宜沙沃地苗引蔓可延十餘丈節節有根近地卽著其莖中空其葉狀如葵而大如荷開黃花如喇叭狀結瓜正圓間有長尺許者一莖可結數十顆嫩時皮色或綠或白或斑老則轉黃肉厚味甘其中瓢赤子藏瓢中子晒乾煎食亦香吾邑家家種之大者重十餘斤亦可蜜食

胡瓜 俗名黃瓜李時珍曰張騫使西域得種故名胡瓜其種二月生苗引蔓葉如冬瓜亦有毛花黃色結瓜圓一二寸長五六寸可生食亦可醃藏種宜陽地

絲瓜 本草釋名曰天絲曰天羅又有布瓜蠻瓜等李時珍曰此瓜老則筋絲羅織故有羅絲布等名或云種自南方來故名蠻瓜二月下種生苗牽蔓圃中作棚架插竹竿引之結瓜圓寸許長五六寸綠色皺紋

可烹可醃可蜜老則瓢如絲網可以滌器俗呼爲洗鍋羅種宜背陽而向陰

苦瓜 救荒本草一名錦荔枝一名癩葡萄蔓延草木莖長丈餘開黃花結瓜二三寸或五六寸遍體疥癩色間青白羹食苦澀饒有清氣亦可醃可蜜

越瓜 俗名菜瓜陳藏器曰瓜生越中又名越瓜有綠白二色皮堅硬而有瓣紋以醬漬之味甚鮮而脆

地瓜 莖蔓生結瓜肥圓大者如巨碗次者亦四五兩與苕芋同類皮淡黃肉白秋季掘而煎食味甘而粹非邑舊產近十年來間有種者

瓠瓜 瓜長數尺或尺許粗如人肘首尾粗細略同秋熟味甘專以供食諸書多名爲瓠一種短頸大腹味苦可用以盛酒水或製爲笙諸書多謂之匏一種上部細長下腹圓大別名懸瓜晉人名爲葫蘆俗名疙

長壽縣志

卷十二 植物

八

瘡人家以白酒醪三者雖形味各不同其實皆一物也

甘藷 本草拾遺名甘儲一作薯一名蕃藷俗名紅薯二月下種宜高沙地莖長數尺至丈許剪而栽之三節爲一株相間尺許自四五月至六七月皆可陸續栽種一莖蔓延至數十莖節節生根一畝可收數十担勝穀二十倍有皮白肉紅者有皮紅肉白者貧者以之代糧貯藏之法選佳者晒乾於陰地掘穴納貯其中穴底布糠以麥梗等爲側壁置藁於上覆以土更加藁以防溼氣可經久備荒

山藥 俗名白苕又名脚板苕一名佛手苕根大多歧狀如人手脚故名李時珍曰供饌則家種爲良入藥以野生爲勝蓄種之法宜炕火邊至春大者切爲數片窖之土中亦生

馬鈴薯 俗名洋芋原產於南美之智利國莖高二尺許結實爲塊狀圓形一窩多至數十枚少亦數枚如馬鈴故名農家以之代糧

芋 本草釋名土芝又名鱗鴨史記曰岷山之下野有鱗鴨注云芋也
一名芋魁芋類雖多苗並相似莖高一二尺葉大如扇有水旱二種水
芋宜田旱芋宜土吾邑種水芋者最多亦可用以代糧

魔芋 本草拾遺名鬼芋又名鬼頭磨漿和石灰少許煮熟成腐與黃
豆同其根蔓延穿土掘不易盡芋一次種後不須再植又磨時或無漿
不成腐以鬼魔名者謂近於邪魔也

薇 一名野豌豆生麥田原隰中莖葉氣味皆似豌豆其葉作蔬入羹
皆美一名巢菜按巢菜有大小二種大者即薇乃野豌豆之不實者小
者即元修菜蘇東坡云菜之美者蜀鄉之巢故人巢元修嗜之故名野
生農人無種者

蕨 莖嫩時無葉採取以灰湯煮去涎滑曬乾作蔬味甘滑和肉煮食
甚可口薑醋拌食亦佳荒年可救饑根紫色皮內有白粉搗爛洗澄取

長壽縣志

卷十三

植物

七

粉名蕨粉最美亦係野生

菌 地生者名爲菌木生者爲樵一名蕈品類千百宋陳仁玉著菌譜
甚詳近人侯官陳彭譯有家長養法謂人工所種者乃無毒天然生者
常因梅雨蒸溼毒不可食吾邑無家菌皆野菌然亦往往有佳者晒乾
久貯不亞口菜

韭 禮記韭曰豐本本草一名草鐘乳

陳藏器曰鐘乳
言其溫補也

葉細長而扁秋日莖

頂開小白花成叢根莖肥白而嫩名韭黃味甚美陸游詩雞跖宜菰白
豚肩雜韭黃豪貴皆珍之

葱 有二種一名四季葱一名牛角葱高一二尺葉爲平行脈四時可
採食地下莖色白俗名葱白又本草釋名名孔並有菜白和事草等名
名孔者葉中空有孔故從孔此物諸食皆宜故稱菜白和事云

薤 俗名苦薤音叫本草釋名薤子葉狀似韭韭葉中實而扁有劍脊

薤葉中空似細葱而有稜根如小蒜一本數顆相依而生名曰薤頭白
樂天詩酥暖薤白酒又薤體光滑露難貯古人所以歌薤露也邑人多
種之

大蒜 一顆有六七瓣或十餘瓣者亦有獨顆者苗苔根可食醃藏尤
宜選根之大者浸水一晝夜又埋土中一二日則去外皮甚易而後植
之土中則長甚速

小蒜 孫面唐韻云張騫使西域始得大蒜種初時中國只有小蒜蒜
乃五葷之一故許氏說文及本草綱目俱謂之葷菜五葷卽五辛謂辛
臭昏神非齋日所宜也道家以非薤葱芸苔胡荽爲五葷佛家以大蒜
小蒜興渠卽阿魏慈葱葛葱爲五葷今人謂肉食爲葷不知齋必變食亦
有珍味調攝之周禮王齋日三舉殺牲盛饌日舉平日一舉齋日三舉
並非茹素葷字從艹與肉無涉

長壽縣志

卷十三

植物

八

芫荽 本草綱目一名香萎可以香口一名胡荽張騫使西域得種歸
故名王楙農書云胡荽於諸蔬中子葉皆可用生熟俱可食邑人間有
種者

茴香 一名懷香結子如麥粒輕而細有稜俗呼爲大茴香肉與醬雖
臭入少許卽香又有小茴香八角回香兩種俱屬香料果之屬

桃 李時珍曰桃品甚多且早結實然不耐久五年卽老十年卽死以
皮甚緊也若四年以刀自樹本豎削其皮至生枝處使脂液出盡則多
延數年其花有紅紫白各色之別其實有以色名者如紅桃白桃碧桃
胭脂桃等是也有以形名者如方桃扁桃等是也有以時名者如早桃
秋桃霜桃等是也並可供食惟山中毛桃質粗味劣不堪入口然其仁
多脂可入藥並可多植以備移接吾邑種植成園者以白花桃仙桃爲
最多又桃李生蛀以煮猪首汁冷澆之卽免

按內經桃爲肺果

李 羅頤爾雅翼李乃木之多子者故字從木子綠葉白花其種近百
且能耐久其實大小不一其味甘酸苦澇各異其色有青綠朱紫黃赤
之殊其形有牛心馬肝柰李杏李離核合核之別吾邑種植成林者以
青翠李黃臘李雞血李為多 按內經李為肝果

杏 種類甚多二月開紅花結實黃而圓者為金杏甘而有沙者為沙
杏黃而帶酸者為梅杏青而帶黃者為金杏吾邑各種均有 按內經杏
為心果

栗 栗高數丈葉如箭鏃初夏開花實有苞甚多刺如蝟毛中有硬殼
紫黑色一包含實或單或雙或三或四殼內有膜裹仁淡黃色九月霜
降後乃熟其苞自裂而實墜乃可久藏不壞 堅緻製器甚美 按內經
栗為腎果

棗 陸佃埤雅云大曰棗小曰棘棘酸棗也棗高故重束棘低故並束
棗高數丈葉作卵形互生花小而黃或白實橢圓形色始青白達成熟

長壽縣志

卷十三

植物

一一

期則轉紅蜜之為餌乾之為藥皆宜又產於直隸山東者謂之北棗產
於浙江金華者謂之南棗皆稱佳品吾邑間有種者酸棗則為木材之
一 按內經棗為脾果

梨 俗作梨 幹高二三丈葉作卵形端尖夏初開花五瓣色白實為漿果大
而圓至秋成熟皮有細點以產於直隸之河間山東之萊陽者為最良
李時珍曰上已無風結實必佳故古語云上已冇風梨有蠹中秋無月
蚌無胎吾邑有青皮黃皮兩種貯藏之法盛竹篾隔以蘿蔔可經久
林擒 或以為即花紅或以花紅為林擒之一種本草釋名來禽以此
果味甘能來衆禽於林故名又名文林郎唐高宗時紀王李謹得五色
林擒以貢帝大悅賜謹為文林郎人因以為名幹高丈餘葉橢圓有鋸
齒春暮開花五瓣白色有紅暈夏末果熟形圓味甘酸可口其質沙鬆
故北方謂之沙果樹易生蟲埋蠶蛾於下或澆以洗魚水可免

柿俗作柿 幹高大葉爲卵形端尖夏至時開黃色微黃實圓青綠色徑二寸許八九月采摘色紅味甘吾邑多生摘置罇中雜以梨一二枚壓好經十餘日取食味美可口可作柿餅一種爲油柿其油質可塗物酉陽雜俎謂有七絕一多壽二多陰三無鳥巢四無虫蠹五霜葉可玩六佳實可啖七葉肥大可臨書

石榴 一名安石榴博物志漢張騫使西域得安石榴種以歸故名栽植時須安僵石枯骨於根下則繁茂多植之庭院中高丈許葉爲長橢圓形平滑夏初開花萼赤花瓣深紅實爲球形赤色有黑斑中如蜂房有黃膜隔之子密成窠形如人齒淡紅色亦有潔白如雪者禦饑療渴解醒止醉皆宜

橘 一名木奴樹高丈許枝多生刺葉作長卵形端尖葉柄有翼狀小片四月著小白花五瓣結實至冬成熟形扁圓色或黃或紅皮薄而光滑易剝味甘微酸吾邑向時種者甚少近二十年來培植成園者或數百株或數千株頗獲厚利

柑 其樹與橘無異但少刺耳實形正圓皮比橘色而稍厚理稍粗不易剝瓢多液甘香沁齒橘可久留柑易腐最畏霜雪不及橘樹之能耐寒也吾邑有皺皮柑廣柑數種種植成林者亦多

橙 本草一名金球陸佃埤雅云橙柚屬可登而盛之故字從登樹高大過橘有刺其大者如碗經霜早熟色黃皮厚香氣馥郁瓢有紅有白嗅之則香食之則甘誠佳果也種劣者味酸苦埋死狗於根下即可改良吾邑間有上種培植成園者亦有數十家獲利頗厚藏橙橘之法裹以松毛拌以綠豆經數月不壞

柚 柚樹與橙無甚差異實亦有酸有甘有小如柑者有大如瓜者甚有圍及尺餘者俗呼香欒味甘者爲貴今廣西容縣之沙田柚最爲著

名吾邑亦間有佳種

佛手柑 樹高丈許葉橢圓鋸齒甚細葉腋有刺春開白花五瓣夏末實熟皮黃如柚形長上端分歧如手指狀俗因呼爲佛手柑清香襲人蜜漬味美

拘櫞 俗名香櫞樹與佛手柑相類置衣笥中經旬有香本草綱目謂卽佛手柑日本田中芳男有用植物圖說分爲兩類

胡桃 一名羌桃俗名核桃博物志謂張騫使西域得種歸故有羌胡二名樹高數丈葉爲奇數羽狀複葉夏初開花成穗下垂淡黃綠色結實如青桃熟後漚爛皮肉始見其核狀堅如鐵捶碎乃得其仁有硬骨間之藏法以布袋盛掛當風處則不膩

枇杷 寇宗奭曰形似琵琶故名羣芳譜秋萌冬花春實夏熟備四時之氣他果無與類者葉爲橢圓形鋸齒甚細互生背有褐色毛甚密冬

長壽縣志

卷十三

植物

一一三

月開小白花五瓣夏初實熟大者如雞子小者如龍眼形圓色黃皮有細毛味甘酸皮肉淡黃色者俗稱白沙枇杷尤爲甘美饑年貧家剝皮晒乾磨麵充腹夏日用葉釀露清香沁脾並以露和酒尤妙

櫻桃 李時珍曰其顆如瓔珠故謂之櫻樹不甚高葉橢圓而闊有鉅齒春時開小白花結實如小球一枝數十顆生食外可以蜜漬及和糖作羹尤美但經雨則虫自内生人莫之見食時用水浸良久則虫皆出乃可食

葡萄 名目頗多圓者名草龍珠長者名馬乳葡萄白者名水晶葡萄黑者名紫葡萄日本有百餘種大概分釀酒果子二種蔓生之本植物有卷鬚葉掌狀分裂頗平滑春末葉腋抽花穗簇開小花色黃綠至秋實熟皮紫綠色星編珠聚甘美可食李時珍曰葡萄折藤壓土中最易生長吾邑所產特果子葡萄耳

無花果 本草釋名一名映日果昔人謂其有七利多食不傷人老人小兒尤宜一也乾可供籩實二也六月至霜降採摘不盡三也扦插即活次年即樹四也葉可醫痔五也可糖蜜六也隨地可植或鮮或乾可濟饑七也三月發葉大而粗糙三裂或五裂五月無花而實實爲肉果無核熟則紫色軟爛味甘如柿中有蛋白汁之成分可助消化作用橄欖 梅聖俞集名青果紀事珠名忠果王楨農書名諫果樹高可數丈葉爲奇數羽狀複葉花攢簇成總形實尖長色青核內有二竅中有仁廣東有一種橄欖頗大其核可代木炭之用可生食蜜漬鹽藏亦佳研核作汁治骨鯁喉痛其效如神

銀杏 一名白果樹高或至十丈葉如鴨掌故又名鴨脚子有缺刻面緣背淡二月開花成簇青白色夜間隨開隨落人罕見之一枝結實百十枚經霜乃熟爛去皮肉取核爲果其核兩端尖三稜爲雄二稜爲雌

長壽縣志

卷十二 植物

一四

其仁嫩時綠色久則黃可食此樹須雄雌同種近能相望乃結實或雌樹臨水或鑿一孔納雄一塊坭封之亦結實陰陽相感之妙如此又銀杏質理堅重製器不裂

木蜜 俗名拐棗詩所謂南山有枸是也幹高三四丈葉圓大如桑拓夏月開花成簇色青白枝頭結實如鷄爪長寸許紐曲開作兩三歧儼若雞之足距嫩時青色經霜乃黃味甘如蜜每開歧盡處結一二小子狀如蔓荊子內有扁核赤色如酸棗仁因名棗實未落時多爲野獸獐子等所食吾邑獵人多於樹下掩取之又此果能解酒毒若以爲柱則屋內之酒皆薄又拐棗子鴨食之即死此不可解者也

慈姑 一名茨菰植於水田莖高二三尺中空葉如燕尾前尖後歧秋開白花爲圓錐花序地下之球莖形橢圓一莖歲生十二子如慈姑之乳衆子其莖須灰湯熟去皮乃不麻澀又磨汁可製粉霜

落花生 一名地豆一名長生果莖蔓生鋪於地上葉爲羽狀複葉夏秋之交開花色黃如蝶形花後子房入地一二寸結實成莢秋末收之以供食並可榨油現有新種俗呼洋花生結實肥大但米粒多不充味亦稍遜吾邑種者頗多

藕 蓮之地下莖也肥大有節中空如管可生可熟可磨粉婦人產後忌生冷惟藕不忌以能破血也如欲久藏以泥裹之則不壞

芋 有地粟烏芋鳧此等名莖高二三尺管狀色綠花穗聚於莖端頗似筆頭地下之塊莖形圓可供食亦可磨粉誤吞銅鐵者食之卽化種宜穀雨日

菱 一名水粟種陂塘中莖端出葉兩角者菱三四角者菱浮於水面柄上具浮囊夏月開花四瓣色白實有兩角三角四角等形故謂之菱角生可剝食老則蒸煮搗米爲飯爲糕爲粥果皆可代糧其莖亦可曝

長壽縣志

卷十三

植物

一五

收和飯以度荒歉

甘蔗 莖高六七尺葉狹而尖長二三尺莖如竹有節中實有三種荻蔗莖細短而節疏但堪生啖亦可煎稀糖竹蔗莖粗而長榨汁爲沙糖鍊沙和牛乳爲乳糖又有赤色者曰岷崙蔗俗名紅甘蔗

紅子 一名救軍糧古有軍糧不足藉此充食者故名山山谷道旁多有之高二三尺叢生拳密根最堅深枝間如錐二三月開細白花結實圓扁硃紅色纍纍然如珊瑚有如大豆者有如細豆者大者味極甘細者味極苦澀亦有黃色者八九月熟至冬經霜雪其味尤美荒年家貧及甚熟爭摘之磨以蒸餅作糧戊己編云紅子刺梨二物山原之間婦媿未來午茶不繼則耕牧之糧也途左道旁販夫腸吼行子口乾則中路之糧也吾邑山野間尤多

刺梨 考之本草綱目金櫻子一名刺黎子一名山石一名石榴山雞

頭子叢生郊野中幹有刺四月開小白花夏秋結實亦有刺甚密黃赤
色形似小石榴食之消悶煎汁爲膏色同楂梨古方有金櫻酒採刺黎
蒸之曝乾囊盛浸之酒盎名刺黎酒味甚佳按此金櫻正是刺黎金櫻
當作金器與石榴雞頭皆以形狀得名今藥肆金櫻非本草所名反以
刺黎爲別一物謬矣

木之屬

松 王安石字說松爲百木之長故字從公其幹纍砢聳直其皮或光
滑或粗厚或裂爲龜甲狀其葉有張牙列瓣二針三針五針之別二三
月抽蕤生花長四五寸結實棕色密齒層疊成球形木材爲用至廣並
可取油種類甚多有赤松黑松白松海松五鬚松等別有一種高一二
尺者名羅漢松可供盆景吾邑西山南岸一帶松樹成林者甚多每年
割取松油數萬斤頗獲厚利

長壽縣志

卷十二 植物

一六

柏 史記柏爲白木之長故字從白其樹聳直其葉堅硬其皮薄其肌
膩其花細瑣其實如小鈴霜後四裂中有數子大如麥粒其材可爲梁
柱器械棺槨吾邑甚廣惜大者甚少涇縣徐紹基廣種柏樹收子榨油
可奪洋油之利夫川柏油膩古稱良材惜無人提倡耳

杉 有赤白二種赤杉實而多油白杉虛而乾燥幹端直高至數丈葉
作針形較松爲短花單性至秋結球果大如指頭吾邑森林多有之爲
用至廣用他木造屋多生白蠹惟杉與柏可免又有一種名錯節杉作
棺槨最宜

桑 落葉喬木因每歲刈取故枝幹低亞葉爲卵形肥大可以飼蠶雌
雄花皆爲穗狀淡黃綠色實略似棗形謂之椹熟則紫黑味甘可食
其材可製什器其皮可造紙有土桑湖桑嘉定桑順慶桑之別吾邑向
時種桑者甚衆一家或多至數千株或萬餘株因飼蠶屢經失敗現存

者亦寥寥矣

茶 郭樸云早採爲茶晚採爲茗陸羽云其名有五一茶二檟三設四茗五舛今則通謂之茶係常綠灌木高七八尺秋日開白花實三角形至唐時始焙其葉爲飲料大約春日採芽早採而芽細者有兩前雀舌白毫諸名晚採而芽粗者謂之毛尖或稱老茵茶吾邑東西山均產惜少佳品舊時聘婦多用茶故受聘亦曰受茶或曰定根茶天中記凡種茶樹必下子移植則不生故聘婦亦以茶爲禮卽此意也

桂 范成大云凡木葉心皆一縱理獨桂有兩道如圭爾雅謂之浸者能侵害他木也故呂氏春秋云桂枝之下無雜木有金銀丹三種又有月月桂吾邑人家多於庭前及牆外特種之取其濃陰經冬不凋也采花泡去苦澀汁漬以糖甘香可口

楠 一作柟李時珍曰生於南方黔蜀尤多高者十餘丈大者數人引

長壽縣志

卷十三

植物

一七

手方合抱葉爲長橢圓形經冬不凋花淡綠實紫黑木質堅密芳香紋理細膩近根處年久向陽者結成草木山水之狀吾邑亦有此樹特生無成林者明末清初采辦皇木以楠爲多黔蜀騷然又楠木枝枝相避葉葉相讓故又名交讓木文路公所謂移植虞芮者以此

樟 樟產於黔蜀閩廣等處高五六丈大者十圍葉卵形有葉脈三條質硬有光夏初開花小而淡黃實大如豌豆黃色其材聳直肌理細而錯綜有紋宜於雕刻氣甚芬芳俗呼香樟其葉可熬樟腦吾邑八顆鄉黑林子香樟頗多間有採其葉以熬漕腦提香片者惜未改良推廣產量無多

梧桐 樹端直高至十餘丈皮青無節理細而緊枝甚短葉似油桐而稍大光滑有尖其花細蕊莢長三寸許五片合成老則裂開如箕俗呼桐麻盤子綴於上多者五六少者二三大如胡椒其皮仍縐晚春生葉

早秋卽凋古稱鳳凰非梧桐不棲其樹幹之皮剝取水浸可製爲麻以搓繩索並可取油爾雅謂之櫟因其可爲棺也製器具亦佳吾邑人家園亭多特植以藉濃陰云

罌子桐 實狀似罌故名一名油桐又名虎子桐幹多拳曲枝甚稀葉似梧桐而稍小春開淡紅花或白花至秋實大而圓去殼二層中有白米可榨油殼子燒灰作碱餅可作肥料吾邑種者甚多成林者尙少現時晶山組織一桐業林場已植二萬餘株將來可望發達

楊 舊多與柳合稱爲楊柳詩楊柳依依是也然楊與柳實二物枝短硬而揚起者爲楊枝長弱而低垂者爲柳以此相別木材高數似皮色外白內黃因名白楊葉圓而闊成鋸齒形面青背白葉柄長微風卽動枝柯柔脆春間開花實成白絮飛散冬間取其皮斧細遍撒土中來年二三月叢生如林嫩葉可以代糧老葉可作酒麵料其材肌理細白性

長壽縣志 卷十三 植物 一八 堅直用以雕刻器皿甚佳

水楊 俗名麻柳本草釋名有青楊蒲柳等名宜植水邊故名水楊柳略似箭簇形葉柄根部有小託葉夏開黃綠色穗狀花其材可製器充薪炭其枝勁韌可爲箭簇吾邑小溪兩岸多有之

柳 高三四丈枝細長下垂取其皮可編什器如筐篋之類余宗本種樹書云順插爲楊倒插爲柳葉狹而長花深綠色成穗狀實熟則絮飛散如雪落池沼中卽化爲萍近有灰楊柳一種自外傳入枝幹葉色俱灰白長成甚速作屋材尤堅

黃楊 俗呼千年矮常綠灌木幹高二尺許葉爲卵形質厚而柔軟不花不實其材甚堅緻可製木梳及印板之屬本草綱目黃楊性難長俗說歲長一寸遇閏則退李時珍曰今試之但不長耳蘇東坡詩云園中草木春無數惟有黃楊厄閏年吾邑人家園亭多栽插之以供盆景

女貞 本草釋名一名貞朮又名蠟樹李時珍曰此木凌冬青翠頗有貞操故以貞女狀之常綠灌木幹高六七尺葉爲長卵形質厚夏開小白花實亦橢圓色紫黑如鼠矢近時可以放蠟虫俗人呼爲茶蠟樹立夏前後取蜡虫裹置枝上半月虫化遂成蠟質采取蒸化而蜡成矣又木中有名爆蜚蚤亦可養蠟

冬青 一名凍青女貞別種也因其凌冬不凋故以冬青名之常綠亞喬木高丈許葉作卵端尖質厚有光澤實紅而小如赤小豆亦可於立夏前後養蠟以上兩種吾邑俱產而放虫者多若能廣植養蠟獲利頗厚

青杠 邑中產地甚廣皆野生混雜而成林其葉皆可飼蠶其材可爲燒炭其實皆呼爲櫟櫟外殼呼爲櫟斗實可磨漿爲腐壳可浸汁染料按此木別境有專種營利者吾邑第就原植之別攘修除不妄砍伐經

長壽縣志

卷十三

植物

一九

七八年亦可放山一次近來科學發明橡樹之皮可製樹膠用途甚多槐 木質堅重可作屋材製器具初夏開花如蝶形色白微黃炒過煎水染物甚鮮實爲長茨中有黑子可入藥並可染皂

椿 椿有香臭兩種香椿易長而多壽莊子大椿八千歲爲春八千歲爲秋雖寓言亦不無因其木皮肌實而赤嫩葉上香鹽醃均宜俗呼春芽臭椿卽樗樹也葉嗅不可食然可飼山蠶

棟 一名苦棟羅願爾雅翼云棟葉可以練物故謂之棟幹高丈餘葉爲複葉春月開花色淡紫實橢圓如小鈴生青熟黃俗呼金鈴子可入藥治病

皂莢 俗名皂角又有烏犀懸刀等名其樹高大葉爲羽狀複葉夏開黃花如小蝶形亦有白色者結實成莢長扁如刀有三種一種肥而短狀如豬牙一種長而肥多脂而粘一種長而瘦薄枯燥不粘均可以用

洗濯衣服其材可供器具及薪炭之用

楮 木高丈餘葉類桑而粗糙花雄雌異株雄花列爲穗狀如桑雌花作球形實如楊梅蜜漬可食亦可入藥皮有斑紋爲製紙之原料故紙號楮先生

穀一作構楮之別種略似楮惟葉深裂而較粗糙花類楮而較大實熟色紅可食亦可入藥亦可造紙他志謂楮穀爲一物似誤

棕樹幹似圓柱高丈許葉作掌狀分裂有長柄叢生幹端花小色淡黃有苞包之其皮用途最廣編履製蓑織薦作繩均能耐久每樹歲割十二否則樹死卽不死亦不長也其葉亦中繩索

木子樹 俗名椶子樹其實可榨油作燭卽木油也

燈籠樹 樹最易生處處有之深秋滿樹結莢作三稜形紅色成球中分三房各含一子如小豌豆

長壽縣志

卷十三

植物

一〇

傲春樹 春時一葉不生入夏始茂吾邑北真觀有一株他處少見

黃葛 本草拾遺名榕王阮亭居易錄名黃果果特葛之轉音吳省欽

黃葛考云幹枝互怪詭百狀葉似桂稍大團欒蔭數畝不拘冬春以某月植每歲必至某月始發芽換葉幹枝皆擁腫不中繩墨根皆蟠露土上若植巖石之側則則似全不藉土以生者莊子所謂不材而壽者也本境峽名黃葛已見於水經注至今此樹尤多殆卽閩粵間榕樹之大者

楓 楓似白楊幹大數抱高插雲漢葉圓而歧分有脂而香二月開花結實大如鴨卵竅穴流百液凝如琥珀狀有香氣八月熟美國取其液以熬糖與甘蔗無異又可燒爲膠香爲本性冷溼誤臥其上中風毒卽拳曲不伸堅硬細膩可爲建築材料

紅豆 幹高丈餘葉爲羽狀複葉花白色或淡紅實成莢子如大豆微

扁色鮮紅亦有半紅半黑者纍纍然如綴珠可爲果釘其木製器尤佳相傳有人沒於邊其妻思之哭於樹下而卒故又名相思子

合歡樹 本草名合昏又名夜合因其葉至暮卽合故有數名葉如皂莢極細五月開紅花上有絲茸秋實作莢子極細吾邑山野多有之

楸 楸有二種一種名刺楸其樹甚高大周幹起泡如瘡皮色蒼白斑點枝梗間多大刺其木溼時碎乾則堅吾邑所有卽此種

檬 狀似槐葉黃色此樹刺如鐵釘傷人至死以爲挺可以禦侮大葉黑皮結子如豆木理紅色名紅檬皮白起殼葉圓而尖木理白色名曰

白檬二種皆堅理異常邑人用以作春杵鋤柄最佳又可供薪爨竹之屬

慈竹 叢生六七月出筍經年成竹枝葉乃茂筍味鮮美俗呼黃筍質甚柔軟可爲繩蓆亦可造紙利用最廣邑產亦甚多王勃慈竹賦序云

長壽縣志

卷十三

植物

一一一

生必向外示不離本修莖巨葉攢根杳柢叢之大者或至百千株焉而榮結踰乎咫尺好事君子植爲階庭之玩竹有雌雄雌者多筍自根上第一節觀之雙枝者爲雄種時宜選之又宜西南根栽向西北隅蓋竹性西南行西南乃嫩根也其東北老根種亦不茂吾邑隨處皆有

斑竹 色青多斑大可盈握有大小二種大者爲用極廣小者名鐵斑竹祇可作釣竿

白甲竹 節粗而色微白吾邑西山最多織蓆編籬造紙均宜

水竹 質小而勁織蓆最佳屑可作香籤稍可爲帚根葉可供炊爨刺竹 節有芒刺

苦竹 有白紫二種其筍苦謂之諫筍質脆用途少宜作香燭心惟筍燒食味最美

黑竹 初生青質黑斑及老盡黑小而勁直可作葉菸桿

金竹 形如斑竹而小又名荆竹筍最佳種植成林者可獲厚利
冬竹 高大無甚用惟筍可食

觀音竹 葉細密無高大者青翠可愛用以點綴園林

相思竹 產於黃草峽之相思巖兩兩相對生筍省志府志均載之為
吾邑特產

花草之屬

梅 有紅白綠萼臺閣數種祇供賞玩結子者少早開者曰十月梅

蠟梅 一名黃梅本非梅類因與梅同時開香又相近色似蜜蠟故名
有磬口荷花瓣枸英三種

蘭 名目甚多紫梗青花為上青梗青花次之紫梗紫花又次之且有
謂春花為蘭秋花為德者其視紉秋蘭為佩之說不刺謬乎黃魯直云
一幹一花而香有餘者蘭一幹數花而香不足者蕙一種名零陵香則

長壽縣志

卷十三 植物

一一一

真蕙也方莖葉如麻相對生七月中旬開紫花甚香刈之曬以酒芬香
更烈

澤蘭 懸根而生花黃白似蘭而細不用土栽取大窠懸見天不見日
處澆以冷茶清水即生俗名吊蘭花

珍珠蘭 一名魚子蘭色葉蓓纍如珠花成穗香甚濃

樹蘭 木本香與蘭等俗名珠蘭

黃葛蘭 亦木本幹如黃葛其種自外來花香似蘭近時園亭多種之
菊 古人菊譜數家名目數百土地不同命名隨意儘有一種而數名
者惟攜李屠氏藝菊法最簡要吾邑林莊羅紹先最善養菊有五十餘
種花大如碗另有五月開者名五月菊至叢生地下花小色黃者名金

錢菊

牡丹 花品以牡丹為第一芍藥第二故世稱牡丹為花王歐陽花譜

所載凡三十餘種此花最忌烈風炎日種法簡便而最效者於秋分後用猪大腸盤于缸內以猪糞和細新泥壅根則次年花必盛此花不接不佳接須秋社後重陽前單葉者可接以千葉茄根為藥根均可又椿樹接者高丈餘可于樓上賞玩一接便活逐年有花薛鳳翔牡丹八書有醫花一法可採用

茉莉 晉書都人婦女簪柰花為織女帶孝卽此性畏寒宜暖地壅以雞糞灌以燙猪湯或雞鴨毛湯或米泔則開花不絕六月六日以治魚水灌之愈茂

楊梅 葉細而青二月開花甚鮮惜不結子地性異也

瑞香 俗名萬年青有楊梅葉枇杷葉荷葉攀枝之別性畏寒又畏日冬月宜置陽處夏月宜置陰處此花又名麝囊能損他花宜另種

紫荆 本草一名紫珠李時珍曰其木似黃荆而紫故名卽田氏荆也

長壽縣志

卷十三

植物

一三三

春開紫花甚細碎而繁花罷葉出至秋子熟圓如紫小珠故又名紫珠紫薇 以手爪其膚輒動搖故又名怕癢樹五六月始花開謝接續可至八九月故又名百日紅

木芙蓉 本草一名地芙蓉一名木蓮一名拒霜李時珍曰此花豔如荷花故有芙蓉及木蓮之名九月霜降始開故又名拒霜

梔子 花名簷蔔實可作染料喜肥宜糞澆然太多又生白蟻一種小者高不盈尺可供盆景

山茶 李時珍曰其葉類茗又可作飲故得茶名經冬不凋惟喜陰燥不宜肥地

芍藥 世稱花相羅願爾雅翼制食之毒莫良于芍故得藥名鄭風云伊其相謔贈之以芍藥韓詩外傳云芍藥離草也董子云芍藥一名將離以之贈別又名婪尾脊名目數十種八九月間出其根滌以甘泉搗

其老之朽敗處揉調豬糞和泥易以新土卽繁茂

繡球花 花小四瓣復由多數小花攢簇成團周徑三寸許始作青紅色既現深紅如球形故名

杜鵑花 俗名豔山紅于杜鵑鳴時盛開故名格物論一名石榴又名山躑躅徧山皆花色又紅紫故名豔山紅

海棠 有荷包垂絲鐵脚等名海棠本無香惟肇慶靈羊峽春海棠其香特盛種法核生者數十年方有花以嫩枝附梨而贅之則易茂種肥沃地則色紅接以木瓜則色白若不花取己花之木納于根跗間卽花花謝結子剪去之來年花盛而無葉又一種名秋海棠

荷花 一名水芙蓉一名蓮花有紅白二種管子曰五沃之土生蓮花栽宜肥土樹藝書中載有缸荷譜以瓷盆養荷香俱優李白詩荷花嬌欲語可謂窮極狀態矣

長壽縣志

卷十三 植物

一一四

木槿 本草釋名曰舜曰日及曰離落草此花朝開暮落故名日及曰槿曰舜猶僅榮一瞬之義也曰離落謂可植爲離陣也其花可食其木可種可插吾邑田廛間多有之

夾竹桃 葉作籊簇形斷之者白汁夏月開紅花類杜鵑根葉似竹而不勁栽宜肥土栽者以肥水澆之則茂

鹿葱 本草注萱花卽鹿葱今人遂直以鹿葱爲萱花不知萱葉綠而尖長鹿葱葉翠綠而團闊萱葉與花同茂鹿葱葉枯死而後花萱一莖實心而花五六朵遞開鹿葱一莖虛心而花五六朵並開萱六瓣而光鹿葱七八瓣如繖形

月季 俗名月月紅又名四季花翠蔓紅花本境少霜雪此花一年十二月月輒一開吳人有月季花譜言變種之法愈變愈多幾與菊花同雖不結子而婦女月經不調和酒服之甚效

水僊 又名金盞銀臺李時珍曰此物宜卑溼處不可缺水故名水僊
金盞銀臺花之狀也栽於肥壤則花茂瘦地則無花種時忌用鐵器

玉簪 本草名白鶴仙二月生苗葉大如掌六七月抽莖上有細葉中
出花朵十數枚長二三寸本小末大未開時如白玉搔頭形故名玉簪
分種時忌鐵器與水仙同

鷄冠 花形如雄鷄之冠故名有掃帚雞冠以高爲貴有扇面冠以矮
爲貴分紫黃紅白四色紫黃各半者名鴛鴦雞冠花最耐久

雁來紅 本草拾遺一名老少年雁來紅者雁來時紅也老少年者其
葉嫩時青黃至老而紅甚豔也

鳳仙 本草有急性子金鳳花等名俗名指甲花李時珍曰其花頭翅
尾足俱翹然如鳳狀故以鳳名之其子老則迸裂故有指甲急性諸名
此草不生虫蠹蜂蝶蛇虺亦不近其毒可知

長壽縣志

卷十三

植物

一五

指甲 夏月開花香似木犀其種來自西域婦女用以染指甲較鳳仙
尤佳有黃白兩種

薔薇 種類甚多吾邑半野薔薇蘭花與薔薇皆有一點露珠在花間
此眞花露也又一種似薔薇而小一倍十花者爲十姊妹一蓓七花者
爲七姊妹日本安井眞八郎著有薔薇栽培法

蝴蝶 有金蝴蝶銀蝴蝶二種金色黃銀色白花皆六出儼如蝴蝶狀
黃瓣上有赤色細點白瓣上有黃赤細點

含羞草 一名見面羞葉如皂莢細碎對生嫩綠色其梗可六七寸花
園無人時合分自如人偶見之或以手探之葉遂合而不開其梗倒垂
如羞見人也

向日葵 常傾朵向日不令照其根故名慈谿陳啓懷考得向日葵用
途極廣多種可辟疫子可榨油作乳哺嬰兒尤勝牛乳楷葉燒灰可製

肥皂其稽用化學提煉又能抽絲比於蠶特載之以備考驗

滴滴金 本草綱目名旋覆花酉陽雜俎名金錢花以狀名也爾雅名盜庚花庚者金也謂其夏開黃花盜竊金氣也澤邊生者花小瓣單人家栽者花大蕊簇其苗由陳根卽生新苗根由花梢露滴入於土中卽生新根故名滴滴金也

朱藤 本草綱目名紫藤莖長數丈徑可六七寸引蔓作棚氣極清新凡園亭中有葡萄架者多並植朱藤綠陰倍濃相傳植此可免毒虫蘆 初生曰葭未秀曰蘆長成曰葦短小於葦而中空皮厚色青蒼莖也荻也萑也

葛 有野生有家種可爲絺綌子可作粉名葛粉亦可食

棉 棉有二種木棉產於廣東福建可實裯襦而不可彈紡或疑爲禹貢島夷卉服者是也草棉名吉貝本印度產南史作古貝或以爲唐時

長壽縣志

卷十三

植物

二六

或以爲元時入中國現在河南等省普種者是也莖高二三尺葉掌狀分枝花白結實如桃熟錠錠裂挺露采取之用機繳去其子彈之爲絮紡之爲紗織之爲布子可榨油滓可糞枯可薪葉可飼牛近因布紗價昂吾邑種者漸多惜地不宜棉結果繁茂與中州同惟實多不裂花質不良故亦未能普種

蒲 一名香蒲其嫩根可食詩惟筍及蒲周禮謂之蒲菹今人罕有食者惟八九月收葉以織簾花中藥屑細若金粉蒲黃可入藥

藍 陸佃埤雅云月令仲春令民毋刈藍以染康成言恐傷長養之氣也然則刈葉先王有禁制故字從艸從監藍有三種大藍蓼藍菘藍最佳於夏至前後視葉上破紋方可收割凡五十斤用石灰一石同浸缸內至次日已變黃色去梗用木爬在缸中四面攪和粉青色變至紫色然後去水成靛矣日本堀內良平編有山藍新說吾邑西山一帶產藍

最富前清時年可售銀一萬數千兩嗣因洋錠充斥土錠無人承買種藍者遂少現因抵制日貨洋錠稀少吾邑種藍者又普遍於西山矣其他各鄉亦間有種者

仙人掌 多于石上貼壁而生如人掌故名按羣芳譜云仙人掌非草非木亦非果蔬無枝無葉並無花土中突發一片與手掌無異膚色青綠光滑可愛掌上生米色細點每年祇發一片種之家中可鎮火災種法取一片切作三四塊植之肥土自生

萬年青 一名千年矮多年生之常綠草經冬不凋故名

寮葉 一名箬又名籜青而淡柔而韌新舊相代四時常青可以作笠及蓬至端午節包米糉尤必用之

燈草 本草綱目一名虎鬚草初秋刈其莖折抽中心白瓢引長若綫用爲燈炷不抽心可織蓆甚爲綿軟吾邑種者頗多外有水燈心草一

長壽縣志

卷十三

植物

一七

種野生祇供藥用

菸草 俗名葉子菸又名淡芭菰此草于明代由呂宋傳入中國北邊寒疾非此不治關外人至以匹馬易菸一筋崇禎末下禁菸之令民間私種者問徒刑尋令犯者斬旋因邊軍病寒無治遂弛禁其葉製捲菸鼻菸絲菸等吾邑家家種之候官陳壽彭譯有淡芭菰製法其言治雪茄烟亦無難處以菸桿熬濃汁蘸葉上隨蘸隨薰凡六七次擇葉之精嫩者在外粗破者在中中有通烟之道一綫而後緊捲封固銳其頂捲成後切之往有西人在閩戲試製味濃郁可喜今中國每年雪茄烟入口亦一巨欸倘能仿製特足以塞漏卮並可出口銷售姑記于此以資考證云吾邑家家種之而以葛蘭鄉爲最盛每年約值數萬元

萍 大者名蘋中者名荇葉相似而圓其小者卽水上浮萍也

陽雀花 杜鵑鳴時卽開故名花枝似枸杞葉間有小刺花絕似蠶豆

色黃一葉一花金光成串吾家籬邊有此

七里香 相傳以爲芸香其說不一有草本木本二種吾邑所產者皆草本其香較木本清遠

藥之屬

艾子 一名吳茱萸禮記名毅味辛香八月擣濾取汁入石灰攪成名曰艾油與吳茱萸功用頗同能療水氣

巴豆 本草名巴椒李時珍曰此物出自巴蜀而形如椒豆故名最能瀉人緊小者爲雌有稜及兩頭尖者爲雄雄者峻利雌者稍緩

杜仲 本草綱目一名思仲一名思仙李時珍曰昔有杜仲服此得道因以名之初生嫩葉可食花實苦澀生者治腰膝痛

桑寄生 寓木也李時珍曰此物寓於他木而生故曰寄生松楊楓桃等樹皆有寄生而以桑上爲貴人必折斷其莖出青烟者始真助筋骨

長壽縣志

卷十三

植物

二八

益血脈

枸杞 一名枸繼本二木名此物棘如拘之刺莖如杞之條故兼二名其實除煩益志浸酒最佳其根名地骨根其皮名地骨皮去風熱益精氣

柴胡 柴古作薺嫩葉可茹治寒熱邪氣推陳致新

款冬花 百草中惟此不懼霜雪嫩葉可食係草本今人乃以枇杷花代之消渴喘息呼吸

葶麻 子可取油久存不壞用以養印色製肥皂極佳研傅瘡疥並可塗手足心以催生

扁竹 本草綱目名扁蓄一名扁竹而射干之下亦有扁竹之名人遂混扁竹射干爲一按扁竹注云多生道旁卽爾雅之王芻苦平無毒射干注云高二三丈其葉叢生橫鋪一面如鳥翅及扇之狀故又名鳥扇

苦平有毒其主治各不同雖李時珍亦云射干卽今之扁竹時珍斬陽人彼所謂扁竹未必卽吾邑之扁竹本草釋名異物同名者多不可不慎也扁竹可罨醬煮汁飲小兒療虻虫尤驗

半夏 禮記月令五月半夏生蓋夏之半也消痰下肺氣

土茯苓 李時珍曰按陶宏景注土茯苓亦名禹餘糧昔禹行山乏食采此充糧而棄其餘故名食之當穀不饑外有仙餘糧冷飯團等名亦其遺意也有赤白二種白者良固中止瀉

瓜萑 一名果羸詩果羸之實瓜萑卽果羸之轉音與木同許慎云木上曰果地上曰羸瓜萑蔓生附木故得兼名其根作粉潔白如雪卽天花粉治咳嗽滌痰結

遠志 本草亦名小草爾雅名要繞能除邪氣利九竅益志慧其根可以治痰症甚效

長壽縣志

卷十三

植物

二九

蒼朮 一名山精嫩苗可食根如薑蒼黑色肉白入藥能散風益氣

獨活 一莖直上不爲風搖初產於羌中故又名羌活根可入藥能治風寒酸痛

益母草 本草名充蔚以其充盛密蔚名也其功宜於婦人及明目精故有益母及益明之稱

仙靈脾 一名淫羊藿生於不聞水聲處者良治陰痿利小便

防風 治風要藥故名又有石防風生山石間采嫩葉作菜辛香而甘呼爲珊瑚菜白居易在翰林時賜防風粥一甌食之口香七日卽此

黃精 實如黑豆可食根爲管狀如嫩薑均可入藥益中氣除風溼蒲公英 一名黃花地丁能健胃又婦人乳癰煮汁飲或敷貼之立消

別一種名紫花地丁治一切癰疽疔瘡尤妙

白頭翁 花蕊尖端有毛下垂如白髮老翁故名其莖有風則靜無風

則搖能治熱利下重

山慈姑 根如水慈姑花如燈籠而朱色癰疽一切磨醋傳之效並治蛇咬傷

石蒜 一名老鴉蒜一名一枝箭生水邊下溼地其葉直生出土四垂葉狀似蒲而短根形如蒜瓣味甘荒年貧家掘以磨粉用水漂其澀味數次可代糧敷貼腫毒亦妙

白茅 俗名毛根春花者爲茅秋花者爲菅下五淋止吐衄諸血症龍膽 根似牛膝味甚苦治喉痛去目中黃及睛赤脹腫瘀肉高起痛不可忍諸症

鬱金 以根和酒令黃如金浸水可作染色並可入藥治血氣心腹痛諸症古時以之浸酒祭祀用之謂之鬱鬯

香附 本草名莎草其根相附連續而生可以合香故名采取其根燎

長壽縣志

卷十三

植物

三〇

去黑毛曬乾入藥散寒和三焦解六鬱皆宜

香薷 氣香葉柔產吾邑走馬嶺者佳治霍亂吐下散水腫清暑氣薄荷 莖葉均有特別香氣治風暑要藥又可製薄荷油薄荷腦等紫蘇 子可榨油燃燈甚明并能柔五金入藥另有白者一種名荏又名白蘇專用爲香料子亦可榨油除寒熱及治一切冷氣

艾 王安石字說艾可又疾故字從乂醫家用以灸沉寒鋼疾故又名醫草以五月五日連莖採取用以入藥止吐血下痢

臭蒿 一名黃花蒿又名茵陳蒿可罨醬入藥治溼熱發黃

青蒿 本草釋名又名香蒿嫩時醃醋爲菹自然香治瘧疾寒熱

夏枯草 本草名鐵色草朱震亨曰此草夏至後卽枯蓋純陽之氣得陰則枯故名治寒熱目珠痛至夜更甚者神效

劉寄奴 宋高祖劉裕小字寄奴首得此草故名治金創最效

青香 亦稱野雞與雞冠同類異種治肝明目

續斷 治金創跌打能續筋骨

荔實 一名鐵掃帚其莖勁挺可爲帚故名治皮膚寒熱湯洗之

牛膀子 其子多細刺故一名惡實治風毒腫

蒼耳 一名鼠耳卽詩之卷耳可食謂之常思菜治風氣及燒癢

牛膝 陶宏景曰其莖有節似牛膝故名有紫白二種紫者佳莖紫葉

大者爲雄青細者爲雌以雄爲勝治寒熱

麥門冬 李時珍曰根似麥而有鬚其葉如韭凌冬不凋故謂之麥門

冬又有烏韭愛韭馬韭羊韭禹韭忍冬諸名可以服食斷穀故又有不

死草之稱根肥大者良去熱止煩

燈籠草 一名酸漿治咳嗽風熱明目

苦菜 採嫩者曝蒸作菜食治暴熱火瘡

長壽縣志

卷十三

植物

三二

地膚 一名鳴舌草子落則老莖可爲帚能去皮膚熱氣

王不留行 越年生草莖高一二尺葉形如箭鏃春夏開淡紅花萼爲

筒狀瓣端有凹形子如豆熟則黑此草性走而不住治風毒通血脈

車前草 爾雅云芡苳卽詩之芡苳也又有馬烏牛遺諸名陸機詩疏

云此草好生道旁牛馬跡中故有數名古人有種車前剪苗食能利水

道除溼痺

馬鞭草 本草又名龍牙草鳳頸草蘇恭總曰類鞭鞘故名馬鞭李時

珍曰龍牙鳳頸皆因穗得名治金創行血和血

蛇含草 含一作銜本草異苑云有田父見一蛇被傷一蛇含一草著

傷痕上經日傷蛇乃去田父乃取草治毒甚驗種之亦令無蛇喉痛者

含之便愈

狗尾草 卽亂苗之莠也狀如狗尾故名又名光明草凡疔目貫髮穿

之卽乾滅赤眼者翻目險以一二莖蘸水夏去惡血甚良

旱蓮草 柔莖斷之有墨汁故又名墨斗草止血排膿烏髭鬚可作麩藥

穀精草 產於水田附近係穀田餘氣所生故名一株叢生數十葉秋日葉間抽莖莖頂由多數鱗片結成小球每鱗片中輒藏一花點點如亂星故又有流星戴星諸名治頭風目盲翳膜痘後生翳鼻血不止用草爲末熟麵湯服二錢

見腫消 一名土三七消癰毒患狗咬搗葉貼之

使君子 治小兒五疳殺疔虫

牽牛子 黑白二種治水腫除風毒

土瓜 卽月令之王瓜橢圓而長味甘如薯蕷可食又名公公鬚與地黃苗名婆婆奶可稱絕對治面瘡利大小便

長壽縣志

卷十三 植物

三二一

何首烏 本草綱目云此藥本名交藤唐時有人服之年至百三十而頭髮猶黑因名何首烏李翱有何首烏傳以人名爲藥名也有赤白二種赤者雄白者雌治一切宿疾爲滋補良藥

通草 卽木通也除脾胃寒熱通九竅血脈

鈎藤 葉腋有曲鈎藉以攀緣他物治小兒寒熱驚癇以紅色者爲良排風藤 治風熱丹毒目赤頭眩

金銀花 本草綱目名忍冬釋名又稱爲鴛鴦藤陶宏景曰藤凌冬不凋故名忍冬李時珍曰其花長垂鬚黃白相半故有金銀鴛鴦等名治熱毒血痢水痢等症

石菖蒲 一名堯韭典術云堯時天降精於庭爲韭感百陰之氣爲菖蒲故又名堯韭此物生泥水中者不佳有九節生石上者佳葉有劍脊瘦根密節高尺餘者石昌蒲也入藥以此爲良治心腹冷氣痛常嚼昌

蒲飲食永無腹痛之患古詩有九節菖蒲石上仙之句

骨碎補 隱花植物根莖細長延繞於樹上或岩石上一名石毛薑能

破血止血

五加皮 譙周異物志名文章草又名白刺頭治溼毒泡酒尤佳

罌粟 本草釋名一名米囊子一名御米一名象穀俗名鴉片或呼阿

芙蓉古人或作穀或作藥品或作花譜原米刺其皮取其漿為熬膏吸

食也又蘇子由罌粟詩有罌小如罌細如粟苗堪春菜實比秋穀研作

牛乳烹為佛粥等云云是此物為我國舊有並非外洋流入惜數百年

來嗜好烟膏者臥床吸食沈淪黑海遂不免指為毒物列諸禁政罌粟

其任咎乎治下痢脫肛遺精久咳等症最為神效

動物

鳥之屬

長壽縣志

卷十三

植物

三三三

鷄 風俗通祝鷄翁善養雞故呼祝祝徐紘云雞稽也謂能稽時也俗

每以雄雞生卵雌雞叫且為凶兆然人家間有之亦無甚徵驗李時珍

謂殺之即已吾國善養雞者一年可至四五觔英國女皇曾設宏壯家

禽社討究飼養法美國胡兒別士著有家雞飼養法日本人譯有家禽

疾病篇極詳雞之利甚大吾邑養者多未得法

鴨 禽經鴨鳴呶呶自呼其名本草音木李時珍曰鴨通作木鴨性質

木無他禮庶人贊匹匹雙鶩也雌鳴雄瘖俗呼雄者為鴨青人病聲帶

不足曰鴨青聲氣鴨症曰鴨青瘠肉味美富脂肪卵充食用毛亦可售

產卵不定其處且好陰溼地通常不自鴨卵皆令雞孵之

鵝 李時珍曰鵝鳴自呼江東謂之舒雁似雁而舒遲也古代婚禮用

雁大夫贊雁皆鵝也夜鳴應更能啖蛇及蚓故養鵝以避虫豸又犬咬

以鵝糞敷之不爛不痛癰疽無頭用新生鵝蛋殼燒灰存性為末醋調

數之立穿產卵不多肉粗硬食難消化而肝爲貴重食品

鴿 張九齡以鴿傳書呼爲飛奴雖遠能自還家有青白皂綠灰斑數色相鶴之法全在眼睛有大小黃綠硃砂數種硃砂者爲最欲睛有硃砂雛時以人之舌常舐其目亦能成硃砂肉與卵俱稱美味

雁 禽經云鴉以水言自南而北鶻以山言自北而南張華注鴉岸並音雁冬則適南集於水干故字從干春則嚮北集於山岸故字從岸狀似鴉有蒼白二種今人以白而小者爲雁大者爲鴻蒼者爲野鴉爾雅謂之鶻鶻南來時瘦北嚮時肥脂味甚美此鳥飛翔有序其飛時或成一字或成人字古詩八月書空雁字斜秋深日落時恆見之

鳧 野鴨也體多脂善沒十餘或數十成羣泛泛于陂塘江浦間俗呼水鴨其同類異形者有撲鴨黃鴨紅鴨扁鴨數種皆可食

雉 漢呂后名雉故諱稱野鷄斑色繡翼雄者文采而尾長雌者文暗

而尾短性好鬪寇宗奭曰雉飛若矢一往而墜故字從矢常宿於坦坡草中不入深林人逐之則埋頭入草中以爲可免故俗云鑽頭不顧尾其卵褐色將孵時雌避其雄潛伏之否則雄食其卵肉脂味美

鷹 本草名角鷹又名鷓鴣鷹以膺擊故謂之鷹頂有毛角故曰角鷹性爽猛故曰鷓鴣少臯氏以鳥名官有鷓鴣氏又大而鷲者曰小雁而鷲者爲隼嘴利同鈎爪剛如鐵眼尤銳敏盤旋空中無微不至雄者身小雌者體大善攫人家鷄鴨雞藉以供食

慈烏 本草綱目有孝烏寒鴉等名李時珍曰烏字篆文象形鴉亦作鴉禽經鴉鳴啞啞故謂此鳥初生母哺六十日長則反哺六十日故有慈孝兩名色純黑鴉甚小羣飛作鴉鴉聲冬月尤甚故謂之寒鴉

烏鴉 本草釋名一名老鴉又名大嘴鴉李時珍曰烏鴉大嘴而性貪鷲不反哺善避矰繳古有鴉經以占吉凶俗以其聲濁憎之聞其驟鳴

不休方中必有死者然亦不甚驗也

鵲 俗呼鴉鵲本草釋名飛駁馬又名喜鵲又名乾鵲李時珍曰鵲鳴

時暗故謂之鵲鵲色駁雜故謂之駁為人報喜故謂之喜性最惡溼故

謂之乾大如鴉而長尾尖嘴黑爪綠背白腹尾翻黑白駁雜善為巢

開戶背太歲向太乙知來歲風多巢必卑下鄉人藉以占風至秋則毛

透頭禿

山鵲俗呼山鷓本草釋名曰音學曰音汁其鳴曰行不得也哥哥狀

如鵲色黑白相間有文采赤嘴赤足尾直而長不能遠飛惟櫻桃熟時

多被竊食人多惡之

斑鳩 本草釋名一名錦鳩一名鴉鳩一名祝鳩李時珍曰鴉祝其聲

也斑錦其形也小而灰色及大而斑如梅花點者並不善鳴惟項下斑

如真珠者聲大能鳴雄呼晴雌呼雨性孝而拙於營巢故曰鴉巧鳩拙

長壽縣志

卷十三 動物

鴉鳩 本草釋名一名布穀一名鴉鳩一名獲穀形如斑鳩而帶黃色

牝牡飛鳴以翼拂擊月令鳴鳩拂其羽為農家候鳥如俗呼阿公阿婆

割麥插禾脫却布袴換工做活之類皆以其聲之相近耳秋收化為鴉

列子曰鴉之為鴉鴉之為布穀布穀久復為鴉此物變也

鸚鵡 周禮謂之鸚鵡俗呼八哥巢於鵲巢樹穴及人家屋脊中身首

俱黑兩翼下各有白點舌如人舌李時珍曰五月五日取鸚剪去舌端

能效人言又取其目睛和人乳研滴眼中能見雲霄外物吾邑紈袴子

弟多畜之

百舌 俗呼牛屎八形似鸚鵡而氣臭又名反舌月令仲夏反舌無聲

此物能反復如百鳥之音居樹孔窟穴中色灰黑微有斑點啄甚尖行

則頭俯好食蚯蚓立春後鳴轉不已夏至後止一作鶯月令名倉庚爾

雅作商庚一名黃鸝俗呼黃老鴉又名沙和尙詩名黃鳥鳴聲嚶嚶故

名鶯雌雄雙飛體毛黃色羽及尾有黑色相間黑眉尖嘴青脚立春後
即鳴其音圓滑如織機聲亦候鳥也

燕 本草釋名有乙鳥玄鳥鶯鳥等名李時珍曰乙者其鳴自呼也玄
者其色也鷹鷂食之則死故有鶯鳥之稱春社來秋社去巢於人家梁
棟間諺云燕子不進愁門故燕來營巢人家有歡迎之意

雀 俗呼老而斑者為麻雀小而黃者為黃雀領嘴皆黑頭如顆蒜目
有孽椒尾短躍而不步栖宿簷瓦間故又名瓦雀

鷓鴣 俗名黃脰雀本草綱目名巧婦又名女匠鳩性拙鷓性巧故得
諸名即詩之桃虫也生蒿木之間居藩籬之上壯似黃雀而小灰白色
有斑取茅葦毛毳為巢至為精密大如雞卵懸於樹上此謂巢林不過
一枝者也他處市井紈袴有蓄黃脰競鬪出重金賭勝負者曰打飄吾
邑尚無此風

長壽縣志

卷十三

動物

三六

畫眉 狀似黃雀而稍大色蒼黃矯健善鬥兩頰有白毛如眉雄者善
鳴其聲悠揚宛轉最動人聽雌則鳴不鬥弄鳥者常飼養之縱其互鬥
以賭勝負與黃脰等但人多養雄者古有相畫眉法

杜鵑 俗名陽雀本草釋名一名杜宇李時珍曰蜀人見雀而思杜宇
故名以俗傳望帝之魂化此鳥故也其他又有子規鷓鴣催歸諸名皆
因其聲似各隨方音呼之狀若鷓而色慘黑口赤頭有小冠春暮即鳴
晝夜不止其聲哀切相傳啼至血出乃止若曰不如歸去鄉俗則但狀
其聲曰舉舉陽曰貴貴陽農家每候以興農事

鴛鴦 體小於鴨嘴扁平而短趾有撲杏黃色有文采紅頭翠鬣黑翅
尾紅掌頭有白長毛垂之至尾雄鳴曰鴛雌鳴曰鴛交頸而臥人獲其
一則相思而死故以喻夫婦之和睦

鷺鷥 禽經鷺飛則霜鷺飛則露命名以此爾雅一名春鋤因此鳥步

於淺水好自低昂有如春如鋤之狀林棲水食羣飛成序潔白如雪頸細而長脚輕善翹高尺餘喙長三寸頂有長毛十數莖氈氈然如絲欲取魚則弭之郭景純云其毛可爲睫羅今人爭獵取以售西人又有似鷺而頭無絲脚黃色名白鶴

鷓鴣 爾雅名鷓一名水老鴉色深黑亦如鴉而長喙微曲善沒洲渚夜巢林木久則糞毒多令木枯漁戶馴畜捕漁

鷓 嘴鈎曲而強羽毛白色長過其尾趾間有蹼常浮水上輕漾如漚形如小白雞能捕食魚介

竹雞 一名泥滑滑一名山菌子一名雞鶻多居竹林褐色多斑性好啼好鬪並好食蟻諺云家有竹雞啼白蟻化爲泥屋柱生蟻畜此可免秧鷄 如雞而小白頰長嘴短尾背有白斑多居田澤畔夏末入秧林搗秧爲窩育卵孵雛夜啼達旦俗名風簸雀穀黃後不知所往

長壽縣志

卷十三

動物

三七

號寒蟲 夜鳴求旦之鳥夏月毛盛冬月裸體晝夜呼叫一名曷旦月令仲冬曷旦不鳴蓋冬至陽生漸暖故也其屎名五靈脂入藥

啄木鳥 俗呼啄木官本草釋名名劉木又名鴛李時珍曰此鳥能裂樹木喙去蠹虫故名小者如雀大者如鴉有褐有斑褐者雄斑者雌面如桃花喙足皆青色剛爪利嘴舌端有針刺喙得蟲蠹以舌鈎出食之又埤雅云鴛善爲禁法能曲爪畫地爲印穴之塞者自開俗傳盜欲退人家門櫬俟啄木飛去故以木塞其穴而布灰於地鳥還卽灰畫符因以討其法焉

翡翠 爾雅謂之鷁左氏春秋鄭子臧好聚鷁冠俗名翠雀雄爲翡其色多赤雌爲翠其色多青又大者名翠鳥小者名魚狗以善於水上取魚故也婦人以其羽爲首飾

獸之屬

豕 許氏說文豕字象毛足而後有尾形牡曰豨曰牙牝曰縷曰豨牡去勢曰豨人家多畜之家字從豕無豕不成家無豕不畜豕邑俗謂牝而生子曰草豬稚而閹之不令生子曰奶架壯曰牙豬西人不重豬肉近考其肉富滋養分遂亦啖之蕃殖甚速肉可供食毛可出售骨可作肥料酒粕豆渣及庖廚餘滓均充食料

牛 牛有犛牛

俗呼黃牛

水牛二種犛牛小而水牛大邑犂水田多用水牛

力大能深犂山田及土多用黃牛不懼陡險肉可食皮革骨角皆有用而乳尤暢銷西人最講飼養之法分肉用乳用役用三種吾邑惟農家畜以耕田宜選骨大胸廣脚直蹄堅者乃強健有力

羊 本草釋名曰羖一曰羝又名羯說文羊字象頭角足尾之形最供用品者及與乳也而乳為第一西人謂羊乳遠勝牛乳人乳吾邑畜羊者少

長壽縣志

卷十三

動物

三八

馬 許慎云馬武也其字象頭髦尾足之形牡馬曰騶牝馬曰騾去勢曰名色甚多體大頸長足稍大而輕快者適於乘騎體大頸短足稍大而堅韌者適於服役西人相馬最精養馬最善而日本人則謂飼馬不如飼牛三十年前鄉有牧馬自武試罷後而用途更少惟苦力家用以運物麵房粉房用以旋磨而已

狗 李時珍曰狗叩也吠聲有節如叩也許氏說文云多毛曰厖長喙曰獠短喙曰獨種類甚多大約長喙善走者可用為獵犬短喙善守者可用為吠犬邑人好犬雖不如西人之甚然居家守夜必選良種俗不食狗肉與牛同忌又狗病磨烏藥飲之即愈

貓 其名自呼陸佃云鼠害苗而貓捕之故字從苗又名鼠將相貓之法以純黃純黑繩白為上以身似狸面似虎柔毛利齒口旁有剛鬚數莖尾長腰短目若金鈴上鬣多稜者為良其睛可以定時正午則圓為

家所不可少者

兔 魏子才六書精要云兔字篆文象形一云吐而生子故曰兔禮謂之明眎言其不瞬而瞭然也善於營窟故古稱其狡蕃殖速飼養易皮與毛皆有用日本農學士稻田乙丙謂牛羊豚馬之外飼兔亦有益吾邑飼兔者少本係野獸有取而飼于家者遂各爲一種

野豬 狀如家豬但腹小脚長毛色褐有重至二三百斤者其肉最美不燥臭抗臘尤佳惟最害田稼山鄉包穀尤甚

豪豬 俗呼刺豬說文豪豕鬣如筆管者能激毫射人李時珍曰狀如豬而滿身棘鬣長數寸粗如筋其狀似筍白本而黑端吾邑鄉村婦女每以插頭呼爲刺豬簪近深山處亦能害稼

山羊 一名野羊謂羊之在原野也一種角大一種角小吾邑西山往往有之

長壽縣志

卷十三

動物

三九

豹 性暴故名狀似虎而小白面團頭其毛文如錢者曰金錢豹宜爲裘如艾葉者曰艾葉豹次之最畏蛇吾邑西山間有之

豺 狼屬俗呼豺狗其形似狗前矮後高尾長體瘦毛黃褐色牙如錐聲似犬氣極臊臭能噬人

狼 俗呼毛狗禽經云狼逐食能倒立先卜所向獸之良者也故字從良大如狗善捕雞鴨其毛色雜黃黑又有蒼灰者其腸直鳴則後竅皆沸糞爲狼煙直上冲霄性善顧而貪戾老則其胡如袋所以跋胡蹙尾進退兩難又狼足前短能知食所在狼足後短負狼而行曰狼狼

狸 本草釋名卽野貓有數種大小如狐毛雜黃黑有斑如貓而圓頭大尾者爲野貓善竊雞鴨蟲鼠肉嗅不可吃有文如豹而作麝香氣者爲香狸俗名青綜皮可爲褥尾有黑白錢文相間者爲九節狸皮可爲裘領有尾似牛面白常登樹食果實者名果子狸味最美省志府志均

載吾邑產此

獺 俗名水毛子本草名水獺四足俱短頭身尾皆扁故俗又名扁子
毛色青黑長三尺許能知水性捕魚甚捷得魚四方陳之進而弗食所
謂祭魚也凡業魚者必馴畜之以捕魚

蝙蝠 俗名簷老鼠本草一名伏翼又有天鼠仙鼠等名其有翼能飛
列入鳥類今科學家以其肉翼獸毛列入獸類形似鼠灰黑色有薄肉
翅連合四足及尾如一晝伏夜飛食蚊蚋能食生育其腦重故倒懸多
生古屋中屎名夜明沙入藥極良抱朴子謂白色者千百歲服令人不
死然唐陳子真宋劉亮皆得白蝙蝠服之立死好言仙者誤人不少
泥豬 與豪豬同類又名滾豬色灰或黃形似犬而以豬名夏季專食
人家包穀紅苕極狡捷肉不美

鼠 壽最長 俗稱老鼠又稱耗子尖喙善穴灰黑色有四齒而無牙

長壽縣志

卷十三

動物

四〇

前爪四後爪五淮南子云魚食巴豆而死鼠食巴豆而肥段成式云鼠
食鹽而身輕食砒卽死西人謂鼠能致疫凡瘟疫流行時下令全國掘
鼠

鼯鼠 俗名黃鼠狼本草釋名又名鼯鼠狀似鼠而身長尾大黃色帶
鼯帶赤極騷嗅健於捕鼠常入人家攪鷄鳴但吮其血而棄之又能制
蛇蝎其豪與尾可製筆嚴冬用之不折不扣謂之狼毫

田鼠 俗呼山耗子脚甚短僅能行尾長寸許目極小最爲禾黍害詩
歌碩鼠指此

蠶之屬

蠶 家蠶有一化二化三化四化之別通常飼育者爲一化蠶四季皆
可有而春夏育者多吾邑有順慶湖州兩種至山蠶則無人試辦二十
年前養家蠶者頗多今亦寥寥矣法國魏雷著有飼育野蠶識略謂已

養過二十餘種地氣不同故難照辦濰縣韓理堂所輯養山蠶法分春秋二季秋繭更勝于春繭極簡明

蜂 吾邑養蜂者甚少間有之亦不過數桶且未得法日本花房柳條著有蜜蜂飼養法內外篇英人傳蘭雅譯有西國養蜂法並及野蜂

蠟 李時珍曰唐宋以前澆燭入藥所用白蠟皆蜜蠟也白蠟則自元以來人始知之其蟲大如蟻虱芒種後延緣樹枝食汁吐涎粘于嫩莖化爲白脂乃結成蜡狀如凝霜處暑後剝取謂之蜡渣若過白露則粘住難刮矣將渣煉化濾盡或甑中蒸化瀝下器中待凝成塊卽爲蜡也其虫嫩時白色可作蜡及老則青黑色乃結苞於樹上初若黍米大入冬漸長大如雞頭子紫赤色纍纍抱枝宛若樹之結實俗呼爲蜡種亦曰蜡子皆白卵如細蟻一苞數百次年立春日摘之以箬葉包之分繫各樹芒種後苞折卵化乃延出葉底復上樹作蜡但樹下要潔淨並恐

蟻食其虫故須時常防護

五倍子 膚木生叢林處者五六月有小虫如蟻食其汁老則遺種作小毯於葉間正如蜡虫之作蜡子也初起甚小漸漸長堅其大如拳或小如菱形狀圓長不等色青綠久則細黃綴於枝葉宛如結實其殼堅脆其中空虛有細虫如蠨蠨霜降前采取蒸殺否則蟲必穿出而殼薄且腐也皮工造爲百藥煎以染皂大爲時用今則西國製熟皮將皮浸於五倍子水內收盡膠質遂變成熟皮比生皮更爲堅韌水難通過亦不腐敗又可造墨水故西人爭購之

螳螂 一名莫緝其子曰螳螂李時珍曰螳螂兩臂如斧當轅不避故又有拒斧之名產卵於桑樹及荆棘間三月中一枝出小螳螂數百枚長成後昂首奮背修頸大腹二手四足善緣而捷以鬚代鼻能翳葉

捕蟬

蛺蝶 大曰蝶小曰蛾其種甚繁皆四翅有粉好嗅花香以鬚代鼻古
今注謂橘蠹化蝶爾雅謂菜蟲化蝶埤雅謂蔬菜化蝶西陽雜俎謂百
合花化蝶北戶錄謂樹葉化蝶丹青野史謂綵裙化蝶皆各據所見者
而言不知蠹蠅諸蟲至老皆各蛻而為蝶亦如蛾如蠶之必羽化也

蜻蜓 本草釋名一名蜻蛉大頭怒目短頸長腰尾躡翼薄如紗食蚊
虻飲露水羅願曰水蠹化助蛻蜻蜓仍交於水上附物散卵復化為水
蠹也

蚱蜢 卽阜呼為蚱蜢者謂其瘦長善跳而猛也長角修股有青黑
斑數色在草上者曰草螽在土中者曰土螽似草螽而大者曰螽斯數
種皆類蝗而大小不一然均能害稼吾邑農人呼為蚱蚱音訛為游
雜母

蟋蟀 一名促織一名莎鷄色光澤如漆有角及翅善跳好鬥善鳴其
性猛其音商立秋後夜鳴幽風七月在野八月在宇九月在戶十月入
牀下吾邑小兒畜之竹筒使彼此相鬥以為戲

蟬 一名蜩謂其音甚調也方首廣額兩翼六足以脅而鳴吸飲風露
頭上有一角如花冠謂之蟬花禮記所謂蟬有綏是也其殼曰蟬蛻入
藥

螢 本草一名夜光一名熠燿並有夜炤宵燭等名體黃頭黑有複眼
翅鞘柔軟尾端有發光器呼吸空氣入內光愈美麗

蜘蛛 王安石字說蜘蛛設一面網物觸而後誅之知乎誅之義者故
曰蜘蛛種類甚多大小顏色不一皆有遺尿著人令人生瘡抽絲布
網井然不紊是蟲類之最有智慧者也

蠅 室內之害蟲惟蠅最烈夏出冬蟄喜暖惡寒糞能敗物蓋糞卽細
卵蛆由此生蛆又蛻化為蠅搬運污物傳布惡疾最為危險不可不防

備也

蟾蜍 爾雅謂之屈秋其皮膚有疣無數疣內分泌白色毒汁犬嚙之口皆腫然取疣中白汁卽爲蟾酥可入藥體肥行遲緩不能鳴常棲息於陰溼之地夜出捕小虫食之俗名癩格寶

蝦蟆 爾雅作鷺蟆王安石字說云俗言蝦蟆懷土取置遠處一夕復還其所雖或退之常暮而返故名蝦蟆常在陂澤中背有黑點身小能跳按百虫解作呬呬聲舉動極急人以爲卽蟾蜍誤矣俗呼闕麻

蛙 俗名青闕麻又名田雞蛙好鳴其聲自呬肉味如雞四月食之最美狀似蝦蟆而背青綠色尖嘴細腹以脰鳴亦有背作黃色者名金線蛙

蜈蚣 本草一名卽蛆春出冬蟄節節有足雙鬚歧尾性畏蜘蛛以溺射之斷爛能制蛇見大蛇則緣上噉其頸人或被噬以桑汁和鹽塗之

長壽縣志

卷十三

動物

四二

卽愈

蚯蚓 俗呼曲鱸生於肥沃土中孟夏始出仲冬蟄伏雨則先出晴則夜鳴吾邑人謂曲鱸滾沙必雨屢試屢驗

蟻 蟻有君臣之義故字從義有大小黑白黃赤數種穴居卵生知雨候覓食必整隊而往奮鬥則結陣而行至死不稍却蓋能合羣以保種者

水蛭 俗名馬蝗生水田中柔滑無骨常附農人足脛吸其血有食入腹者爲害甚大惟以田泥或播黃土水飲之數升可下又以牛羊血同豬脂飲之亦可下

木蠹 食木虫也俗名老木蠹節長足短生老木中穿木如錐詩頌如蝨蟻是也

蛻娘 俗名推屎拔本草釋名一名蛻蛻一名推丸莊子云蛻蛻之智

在於轉丸善入糞土中取屎丸而推却之故又名推丸深目高鼻狀如羌胡背負黑甲狀如武士故有蜣螂將軍之名

竈馬 本草綱目名廉本草拾遺一名賊郎狀如促織稍大脚長好穴灶旁俗言灶有馬足食之兆又偷油婆者亦多在食櫃及廚灶間俗謂能解蜈蚣之毒云

地牯牛 體甚小頭有觸角如牛好居古牆灰沙中作漩渦如豆狀物至則攪食之能倒行鄉村小兒多以爲戲玩品

衣魚 卽蠹魚也本草名白魚常藏衣服及書籍中形狀似魚故名相傳蠹魚入道經中食神仙字則體有五色人吞之可致神仙唐張易之子乃多書神仙字碎剪置瓶中取魚投入糞其蠹食而不能遂心疾書癡可笑古法芸草避蠹今人多用菸草

毛虫 本草名雀甕陳藏器曰毛虫作繭形如甕故名大小如蠶背有五色斑毛有毒能刺螫人俗以形狀可憎於每年四月八日剪紅紙作十字形書字粘貼壁間以驅之謂之嫁毛蟲

鱗介之屬

鯉 鱗有十字文理故名其脅鱗一道無大小皆三十六鱗每鱗有小黑點產長流淡水中者形味俱美在池沼者有泥土氣

緇魚 似鯉而黑色身圓頭扁骨軟長者尺餘其子滿腹有黃脂邑人呼爲巖鯉

扁魚 扁扁也其身扁故名卽魴魚小頭縮頸穹脊闊腹細鱗其色青白腹內有脂肪味最美

鱧魚 性好羣故曰鱧狀如鱸而頭小扁細鱗肥腹其色最白邑呼爲白甲其大口無鱗者方曰鱧魚誤矣

鱮魚 似鱗而色黑其頭最大此魚中之下品蓋庸常以供饕餮者邑

邑呼爲肥頭魚

青薄 似縲而青體薄味美

象鼻魚 鼻長如象蓋有屬也按東山經注云鮪似鱸而鼻長體無鱗

水筩魚 體圓鱗細色白肉嫩味極美宜蒸食惟多刺俗名出水爛

草魚 形長身圓肉厚而鬆以草飼之故名古名鮓有青白二種白者味較勝

桃花魚 古名厥李時珍曰厥蹶也身不能屈曲如僵蹶然形扁腹闊口大鱗細與松江之鱸同狀出水數刻卽餒桃花開時始有之故名桃花

卽魚 本草又名鮒魚陸田埤雅云卽謂其族行以相卽也故謂之卽以相付也故謂之付形似小鯉色黑而體促肚大而脊隆冬月肉厚子

長壽縣志

卷十三

動物

四五

多其味尤美邑產無大者

鱒魚 鱒腹黃色故俗名黃鱒生水岸泥窟中似蛇而無鱗多涎沫大者長二三尺或作鱣魚誤矣

鱮 俗名鰕魚體最小長四五寸沈於泥中銳首肉身青黑色以涎自染滑膩難握物類相感志云燈心煮鱮味甚妙美

石寶魚 產龍溪石縫中長寸許緊粘石上取者警以鞭用網盛之稍緩卽失若拭以手不能得也

閣鰕 產龍溪上游形如鰕而頭尾異味極鮮美藏水底石縫中如閣閣然非鶩沒不能得

鯊魚 俗名吹沙魚小魚也居沙溝中吹沙而游啄沙而食大者長三四寸首尾大小如一黃白色有黑斑點味最美

鼈 俗名團魚水居陸生穹脊連脅與龜同類四緣有肉裙故曰龜甲

裹肉鼈肉裹甲無耳以目聽純雌以蛇爲雄

龜 李時珍曰甲蟲三百六十而龜爲之長外骨內肉廣肩大腰其息以耳壽可千歲無雄與蛇爲牝牡每年秋後收版熬膠者甚衆

蟹 俗名螃蟹傳肱蟹譜云以其橫行名螃蟹狀其鳴聲名郭索以其外骨曰介士以其內空曰無腸公子二螯八足殼上有十二星點如鱗之三十六鱗雄者臍長雌者臍團二螯最美今人尤重食黃腹中之黃應月盈虧生於流水者色黃而腥生於山水者色紺而馨霜降後味美宜於八月取之夜則照火掃之

蝸牛 爾雅一名付贏孫炎注以其負贏殼而行也形似小螺有角如牛行則頭出驚則縮入莊子所謂國於蝸角是也遍體有涎能制蜈蚣又有同類而形伏稍異者二種一曰田螺一曰蝸螺俗統呼螺獅

蛇 種類甚多體爲圓筒形修尾無足以肋骨伸縮而行春出則食物

長壽縣志

卷十三 動物

四六

冬蟄則含土其舌雙其耳聾其毒在涎

守宮 本草釋名一名壁虎一名壁宮色灰黑扁頭長頸四足鉤爪疾走壁上善捕蒼蠅故得諸名

蜥蜴 俗名四脚蛇又名蛇舅母頭扁尾長形小有細鱗生於草澤中又名蛇醫蛇有傷則含草以敷之卽愈

蚌蛤 俗名蚌殼其壳兩片爲橢圓形肉體扁厚以鰓呼吸蚌與蛤同類而異形長者通曰蚌圓者通爲蛤故蚌從未蛤從合肉可食壳可製粉

蝦 多鬚善游而好躍產於江湖者大而白產於溪池者小而青梅蝦梅雨時有之蘆蝦相傳蘆葦所化泥蝦乃稻變成多生泥田中

礦物

煤 南岸扇沱鄉現開六洞廢洞九瓦鑽窰對岸石坂沱現開一洞均

不佳亦不旺東山一帶洞較多色黑而黃燐磺甚重難燃燒烟多灰亦多惟大巖屋白沙灣手爬巖三處稍佳現開者三十一洞皆小上城門洞煤較勝却在涪陵界內西山一帶洞亦多質輕成大塊易打碎近八顆場者色深黑光滑如油黃龍寺一帶煤層顯露土人可以隨便掘歸因係項氏公地開采屢起爭端遂封禁晏家場苦竹溝珠寶洞等處黑色而光潤紋如馬尾易燃燒烟少灰亦少火力最猛鍋廠居家者往往不敢用反選其末購之現開者四十八洞頗大

硝 硝有二種一曰洞硝一曰皮硝而洞產尤佳多在巖石中形塊大小不定吾邑西山產此皮硝產於陰溼老宅地皮內其製法掘硝泥置大池內少者可透以清水於大池外低下處築一小池兩池間通以竹筒使透出之硝質隨水從筒流入小池澄清後舀水入鍋熬之凝為毛硝取毛硝和桐壳灰蘸調勻再熬舀入布袋濾之承以瓦鉢屢熬屢濾雜

長壽縣志

卷十三

礦物

四七

質盡去冷定成磚是為淨硝吾邑業此者甚多向係官督商銷近歸礦局按時定價然私漏者正不少也

硫磺 性善流通而色黃故曰硫磺最毒烈為七十二石之將凡火山及溫泉俱作硫磺氣必產此磺又產磺之地其面為煤層之下為似煤非煤之黑石石層之下即為磺磺大小形狀不一捶碎熬煉即為磺磺向係官督商銷吾邑東西山及南岸均產煤其中磺磺正復不少近年萬順鄉新開三元磺廠專造硫磺白礬以供軍用

鐵 吾邑西山一帶鐵鑛甚富如用西法采煉亦一天然利源也名醫別錄丹砂生符陵山谷中光色如雲母按符陵即涪陵邑舊屬涪陵古有丹穴寡婦清世擅其利今南岸千佛鄉有懷清臺故址猶存是丹穴在邑境可為確證又管子云上有丹砂者下有黃金惜無人發明不惟金鑛難尋鉄礦亦廢雖地不愛寶而人自棄之深為可惜吾邑復興鄉

蔣家曹永順鄉老王溝向來均有鐵廠因欵絀暫時停採

按吾邑煤鐵礦三種東山產煤其質量較優者有黃桷岩大堰溝滴水岩三廠西山煤鐵礦均產八顆鄉黃龍市晏家鄉草竹溝一帶產煤極旺質並佳此外尚有九元鉄廠三元礦廠統計煤鑛每年產量約在四萬噸左右其存儲量之估計約為三千六百萬噸鉄礦開採尙少每年產量在二百噸左右其存儲量之估計約為一百萬噸礦品質較差前曾由三元廠開採年餘產量為五十噸左右其存儲量正在勘查中南岸煤產現開數洞均不佳亦不旺